



R E S P O N S E,

Pour les Curé , Marguilliers & Paroissiens
de l'Eglise de S. Estienne du Mont à Paris
deffendeurs.

A V F A C T V M,

Des Religieux & Abbé Coadjuteur de Sainte Genevieve demandeurs.

I L y a dix-sept chefs de demandes formées par les Religieux de Sainte Genevieve.

I. Pour ordonner & disposer au jour de la Feste Dieu, de la Procession de la Paroisse de Saint Estienne.

II. Pour faire porter en ladite Procession, le Saint Sacrement consacré en leur Eglise, dans le Ciboire ou Soleil de ladite Abbaye.

III. Que le Curé & le Clergé de Saint Estienne se rendront ledit jour dans l'Eglise de Sainte Genevieve, & assisteront à la dite Procession, sçavoir le Curé en son rang de Religieux, sans Estolle, & son Clergé entre la Croix & lesdits Religieux.

IV. Que la Croix seule de l'Abbaye sera portée en ladite Procession, & ce par le Clerc de Saint Estienne, en luy donnant pour ledit jour vne portion de Religieux.

V. Que lesdits Religieux tiendront le Chœur durant ladite Procession, & l'un d'eux portera le Baston de Chantre, & commencera les Antien-
nes & Respons.

VI. Que les Marguilliers de S. Estienne entrans dans l'Eglise de S. Genevieve quitteront les Baguettes & Verges dorées qu'ils ont accoustumé de tenir en main, comme en d autres Paroisses, durant le cours de ladite Procession, & ne porteront autres marques d'auctorité & prerogative.

VII. Que lesdits Religieux estants invitez d'assister aux enterrements des Paroissiens de S. Estienne, le plus ancien d'entre eux portera l'Estolle, leuera le Corps, & fera les Ceremonies à l'exclusion du Curé.

VIII. Que lesdits Marguilliers de S. Estienne ne seront esleus qu'avec l'Abbé, Prieur, ou ancien Religieux, & feront le serment entre leurs
mains.

IX. Que les Comptes de la Fabrique de S. Estienne seront rendus par-
deuant l'Abbe de sainte Genevieve, ou celuy qui sera par luy commis.

X. Que lesdits Religieux choisiront le Predicateur du Carême, suivant la fondation de Frere Ioseph Foullon Abbé de Sainte Geneuiefue, & Curé Titulaire de saint Estienne.

XI. Qu'ils donneront la Benediction aux Predicateurs de ladite Paroisse.

XII. Qu'ils auront la premiere place dans l'Oeuure de ladite Eglise lors des Predications.

XIII. XIV. XV. Qu'aux deux Festes du Patron, l'Abbé de Sainte Geneuiefue pourra faire l'Office dans l'Eglise de S. Estienne, & y mener tel nombre de Religieux qu'il voudra. Que le Prieur de ladite Abbaye pourra aussi aux mesmes iours prendre la place du Curé, & faire l'Office aux Premieres Vespres, Complies & Matines, assisté de deux Religieux Prestres pour porter les Chappes, & de deux ieunes Religieux pour porter les Chandelliers, & l'Abbé assister à la Procession qui se fait auant la Grande Messe en la ruë des Amendiers accompagné des plus anciens Religieux de ladite Abbaye tous en Chappes, apres les Prestres de S. Estienne, & celebrer la Messe *In Pontificalibus* en ladite Eglise de S. Estienne.

XVI. Qu'ils auront l'inhumation des Officiers & Seruiteurs de ladite Abbaye & de leurs enfans & domestiques, à l'exclusion du Curé de S. Estienne.

XVII. Qu'ils commettront, avec le Curé de S. Estienne, l'un des douze Prestres habitez en l'Eglise de S. Estienne, pour faire les Seruices fondez par Frere Philippes le Bel Abbé par contract du 10. Octobre 1556. & demandent l'indiquation ou le remploy de la rente de 200. liures baillée pour ladite fondation.

Toutes ces demandes sont venuës en suite du trouble violent & scandaleux fait par lesdits Religieux en l'année 1639. le iour de la Feste Dieu dans l'Eglise de S. Geneuiefue à la face du S. Sacrement, & de plusieurs autres contentions particulieres, qui auoient esté agitées es années precedentes; Le tout par l'ordre de Frere Charles Faure Abbé Coadjuteur de ladite Abbaye, lequel avec son esprit ambitieux inquiet & entreprenant à recherché toutes sortes d'occasions pour troubler l'ordre de ladite Procession, & l'estat de l'Eglise de S. Estienne: Et neantmoins pour ne point paroistre aucteur de ceste nouveauté, il veut par son *Factum* en rejeter la faute sur le sieur Badran Correcteur en la Chambre des Comptes, ancien Marguillier de ladite Eglise, & au tiltre du mesme *Factum* il a employé le nom de M. le Cardinal de la Roche Foucault, comme s'il auoit entrepris ceste instance, & pour vser des termes de la Loy, *In iusta de speratione causa, titulum & Eminentissima Privilegia Dignitatis opposuit.*

Et neantmoins il n'y a que l'Abbé Coadjuteur, & les Religieux Reformez qui ont paru & sont compris aux Reiglemens de la presente Instance, & dans les Conferences & Assemblées qui ont esté cy-deuant faites pour

sciez ver.
du trou-
de 1639.
nferir à
fin du
ctum des
fendeurs
3. 127.

2. C. de
qui po-
riorum
mina in
em pr-
duant.

chercher les moyens d'accommodement, M. le Cardinal de la Roche-Foucault a tesmoigné ouuertement qu'il improuuoit & desaduouitoit la procedure desdits Religieux, & a dit plusieurs fois qu'il ne pretendoit rien au Spirituel de l'Eglise S. Estienne.

Et pour le fait dudit sieur Badran, c'est à tort que l'on veut engager son nom en cette affaire. Car par le procez verbal de 1638. fait en suite des entreprises des années 1635. 1636. & 1637. il appert que le trouble desdits Religieux, a commencé cinq ans auant que ledit sieur Badran fust en charge, & depuis qu'il a esté esleu Marguillier, il n'a esté rien fait que suiuant les aduis & deliberations du Corps de la Paroisse, & les Successeurs dudit sieur Badran ont suiui ce qui auoit esté commencé de son temps par l'ordre des Paroissiens, pour la deffense necessaire des droicts & libertez del'Eglise de S. Estienne.

Au fonds lesdits Religieux sont demandeurs, & consequemment obligez de verifier leurs demandes, Et si on considere la qualite de leurs pretensions, ce sont autant de charges & seruitudes que l'on veut imposer sur l'Eglise de saint Estienne, contre lesquelles les deffendeurs opposent la faueur de la liberte, & l'ordre du droit commun qui ne recognoist autres Superieurs des Eglises Paroissiales que les Euesques, *Omnes Basilica, secundum priorum Canonum Regulas, in eius potestate consistant, in cuius territorio posita sunt.* Et pour cette raison Monsieur l'Archeuesque de Paris est interuenu en l'Instance pour vendiquer les deffendeurs, & s'opposer aux entreprises desdits Religieux. Et comme en ce point, les interets des deffendeurs sont communs avec ceux de Monsieur l'Archeuesque, Ils ont esté contraincts en expliquant leurs defences, de remarquer aussi les droicts & prerogatiues dudit sieur Archeuesque sur la Paroisse de S. Estienne, non point pour s'arroger, comme on suppose les droicts Episcopaux : mais pource qu'en iustificiant comme ils ont fait, que ledit sieur Archeuesque est seul Superieur, Chef & Pasteur de ladite Eglise, cela destruit par vne consequence necessaire les demandes desdits Religieux. C'est pourquoy dans les Iugemens & Contrats dont sera parlé cy apres, faits entre l'Euesque de Paris & l'Abbé de sainte Geneuiefue touchant l'Eglise de S. Estienne, l'Euesque a traité luy seul, tant pour soy que pour le Curé de saint Estienne, & s'est reserué sur ladite Paroisse, *omne ius Episcopale seu Parochiale*, d'autant que les droicts de l'Euesque & du Curé sont communs & inseparables, en ce que les droicts Parochiaux appartenants aux Curez, sont emanez, & procedent originaiement de la puissance Episcopale, & comme le Curé desert sa Paroisse sous l'autorité & en vertu de l'institution de l'Euesque, on peut aussi dire que l'Euesque exerce dans la Paroisse, ses droicts Episcopaux par l'ordre & le ministere du Curé.

Tran
la fin du
Façum
pag. 117

Can. on
Basilica
quast.
tiré du
Concile
d'Orléans

Reste donc seulement à examiner les tiltres, par lesquels lesdits Religieux prétendent establir leurs demandes, asseoir à leur Abbaye, le Curé & la Paroisse de S. Estienne, & raurir à Monsieur l'Archeuesque de Paris, vne Eglise qui luy est acquise par le droict commun, par tiltres & par vne possession de plus de quatre siècles.

Les Religieux n'ont aucun tiltre particulier faisant mention de leurs prétensions: mais pour tiltres généraux, ils disent au commencement de leur Factum, qu'ils sont Supérieurs, Curez Primitifs, Patrons, Fondateurs, & Seigneurs Temporels de l'Eglise de S. Estienne, & que le Curé d'icelle, fors en ce qui concerne l'administration des Sacremens, & le soing des Ames, est sujet à la Jurisdiction Spirituelle & Temporelle de l'Abbaye de S. Geneuiefue, Toutes lesquelles qualitez sont imaginaires, & contraires à la verité des pieces.

*superio-
rie.* Et premierement pour la prétendue qualité de Supérieurs, il y a nombre de Contracts, actes & iugemens qui iustificient, que lesdits Religieux n'ont autre droict que la simple & nuë presentation de la Cure, & que toute l'auctorité, superiorité & direction de la Paroisse, a tousiours appartenu à M. l'Euesque de Paris, à l'exclusion desdits Religieux, mesmes au temps que ladite Paroisse, en sa premiere naissance, estoit deservie dans l'Eglise de S. Geneuiefue.

*transcrit à
fin du r.
Cum des
seigneurs
g. 92.* La Paroisse de S. Estienne a commencé au mesme temps que la Montagne de S^{te} Geneuiefue fut renfermée dans la Ville, bastie & habitée du temps du Roy Philippes Auguste enuiron l'an 1150. Et pource que les premiers habitans n'auoient point encore d'Eglise Paroissiale ils se retirerent pour vn temps, & par forme de precaire dans vne Chapelle de l'Eglise Abbatiale de S^{te} Geneuiefue, où les Religieux de ladite Abbaye, & auant eux les Chanoines Seculiers qui deservuoient la mesme Eglise, auoient accoustumé de faire administrer les Sacremens à leurs domestiques, qui demeuroient es maisons scizees enuiron de ladite Abbaye sur la cime de la Montagne, au lieu appelé le Bourg de S^{te} Geneuiefue: Et de faict le Concordat du mois de Iuin 1202. fait entre l'Euesque de Paris & l'Abbé de S^{te} Geneuiefue, touchant ladite Paroisse de S. Estienne, porte expressement que l'Autel Paroissial estoit lors *intra Maiorem Ecclesiam* de S^{te} Geneuiefue: Ce qui donna sujet à vne premiere contention, sur ce que l'Abbé de S^{te} Geneuiefue vouloit se conseruer l'auctorité & les droicts Parochiaux, non pas dans toute l'estendue de la Paroisse, comme il pretend aujourd'huy, ains seulement sur les habitans du Bourg de S^{te} Geneuiefue; & au contraire l'Euesque de Paris soustenoit, qu'il auoit le droict de superiorité vniuerselle dans toute l'estendue de ladite Paroisse, mesmes dans ledit Bourg de S^{te} Geneuiefue,

qui auoit esté nouuellement renfermé dans la Ville. Pour raison de-
quoy lefdites parties s'estans pourueuës pardeuant le Pape Innocent 3.
il y eust vne premiere Sentence rapportée au chap. *Olim 2. De Restit. spol.*
qui debouta l'Euesque de la reinte grande par luy demandée, à faute (dit le
texte) d'auoir rapporté la preuue de sa possession : Mais depuis l'instance du
plein possessoire ayant esté instruite, sur les enquestes, & autres preuues rap-
portées de part & d'autre, par vne seconde Sentence du 24. Decemb. 1201.
le Pape Innocent 3. adjugea, à l'Euesque de Paris, *omne ius Episcopale & Paro-*
chiale in tota Parochia de Monte, mesmes dans ledit Bourg de S^{te} Geneuiefue.

Transcripte
à la fin du
Factum
p. 87.
Et les indu-
ctions d'i-
celle p. 35.
vi.

Il est vray que par ladite Sentence, la Paroisse fut declarée exempte des
interdits & excommunications de l'Euesque, & l'institution du Curé ou
Chappelain laissée ausdits Religieux : ce qui fut ainsi ordonné, non pour
soustraire ladite Paroisse de la puissance de l'Euesque, veu que la mesme
Sentence donne à l'Euesque, *Omne ius Episcopale seu Parochiale in tota Pa-*
rochia, ains à cause qu'au temps de ladite Sentence l'Autel Parochial estoit
dans l'Eglise de S^{te} Geneuiefue, qui est exempte, & deservi par le mes-
me Chappelain qui auoit accoustumé d'estre commis par les Religieux,
pour administrer les Sacremens à leurs domestiques. Et d'ailleurs cette ex-
ception qui est restrainte pour le fait des excommunications, & pour l'in-
stitution du Curé fait cognoistre que hors ces deux cas, l'Euesque auoit dé-
lors vne puissance vniuerselle sur toute la Paroisse. Et de plus sur la fin de la
mesme sentence, on reserue à l'Euesque pour ces deux articles, ses droits au
petitoire, *Ex his*, dit le Pape, *que super possessorio, in presenti sunt iudicio deffi-*
nita nullum volumus circa questionem proprietatis preiudicium generari.

Et depuis au lieu d'instruire le proces au petitoire, six mois apres, a esté
fait ledit Concordat du mois de Iuin 1202. entre l'Euesque de Paris & l'Ab-
bé de S. Geneuiefue, par lequel ladite Paroisse a esté soumise absolument
& indefiniement à l'auctorité de l'Euesque, *Omne ius* (dit il) *Episcopale seu*
Parochiale in tota Parochia de Monte habebit Episcopus.

Transcrit
au i. Factum
pag. 92.
Et les indu-
ctions d'i-
celle p. 35.
VIII;

Et pour le droit d'excommunication qui auoit esté excepté par ladite
Sentence, il est aussi delassé à l'Euesque par ledit Concordat, *Prasbyter,*
(dit il) *qui illi Parochia Spiritualia pro tempore ministrabit, Parochianos ipsius*
Ecclesie ad mandatum Episcopi vel Archidiaconi vocabit, ligabit pariter & sol-
uet, sed nec interdictos vel excommunicatos ab Episcopo, vel Archidiacono, un-
decumque fuerint, in altari Parochiali recipiet aliquatenus ad Diuina.

Et quant à l'institution du Curé, elle a esté conuertie par ledit Concor-
dat en vne simple Presentation, qui appartient encores à present ausdits
Religieux. Et c'est le seul droit qu'ils peuuent auoir en vertu dudit Con-
cordat, & duquel ils ont jouy en ladite Paroisse; mesmes du temps que
l'Autel Parochial estoit dans l'Eglise de S^{te} Geneuiefue.

Dans l'induction de cette piece, lesdits Religieux ont ozé mettre en fait, que M. l'Archeuesque de Paris tient de leur bien-faict & liberalité, le droit de superiorité qu'il exerce aujourd'huy sur ladite Paroisse de S. Estienne: Mais pour la decision du differend qui se presente, il importe de peu à quel tiltre ladite Paroisse est soumise à l'autorité de M. l'Archeuesque, puisque son droit est certain & constant par la propre confession desdits Religieux: Et neantmoins il y a de l'extravagance de vouloir attribuer à la concession desdits Religieux, la puissance ordinaire & legitime de l'Euesque dans vne Paroisse de son Diocese, pource que chacun sçait que cette puissance a commencé dès la naissance de l'Eglise plus de 400. ans avant l'establissement de l'Ordre des Religieux de S. Augustin: Et d'ailleurs comment est-il possible que lesdits Religieux de S^{te} Genevieve ayent concedé à l'Euesque, la Superiorité de l'Eglise de S. Estienne, veu que six mois auparavant, le mesme droit auoit esté adjué audit sieur Euesque, par la sentence du Pape Innocent III. & ce au possesseur, par forme de maintenue: Ce qui montre que ladite Paroisse dès sa naissance n'a jamais reconnu autre Supérieur que son Euesque.

Parce Concordat *ab hac generalitate*, c'est à dire, de la puissance generale & vniuerselle de l'Euesque, on excepte vingt-six seruiteurs de ladite Abbaye: Mais cela regarde seulement le fait de la jurisdiction; & mesmes le Contract adjoust, que cette exemption n'aura point d'effect pour les causes de mariage, ny pour les femmes & familles desdits seruiteurs; Et d'ailleurs estant limitée à certains cas & à certaines personnes; cela fait connoistre que hors le cas de ladite exception, la Paroisse & tous les Paroissiens de S. Estienne dépendent absolument de l'Euesque, à l'exclusion desdits Religieux.

On dit que par ledit Concordat, la Paroisse de S. Estienne est appelée Chappelle de S. Genevieve, & reconnuë appartenir ausdits Religieux; mais la piece fait foy du contraire.

Car pour le premier poinct, dans tout ledit Contract, l'Eglise de S. Estienne est qualifiée du nom de Paroisse, & la Chappelle de S. Genevieve dont il fait mention, doit estre necessairement rapportée à la Paroisse de S. Genevieve des Ardants, pource que ledit Contract porte que ladite Chappelle estoit seize dans la Cité.

Et quant à l'autre objection, encores que ladite Paroisse de S. Estienne fust en ce temps-là deservie dans l'Eglise de S. Genevieve; neantmoins dans ledit Concordat, il n'y a vne seule clause d'où l'on puisse induire, que ladite Paroisse soit des dépendances de ladite Abbaye; & au contraire, le Contract conserue à M. l'Euesque de Paris, *Omne ius Episcopale seu Parochiale in tota Parochia*.

Et quand au commencement dudit Concordat, on explique les differends sur lesquels on a transigé, on dit, que l'Euesque de Paris & l'Abbé de S. Geneuiefue estoient en contestation : Premièrement de *iure Parochiali in Parochia de Monte*, & en second lieu, de *Procuracionibus quas in Parochialibus Ecclesiis Canonorum de Monte petebat* : lesquelles Paroisses dépendantes de ladite Abbaye sont toutes nommées sur la fin dudit Concordat, & entre icelles il n'est point parlé de l'Eglise de S. Estienne. Et par le mesme Concordat il est dit, que les Paroisses dépendantes de ladite Abbaye doiuent à l'Euesque vn droit de Procuracion, qui est reiglé & abonné par ledit Contract à quatre liures parisis par an, & quand il parle du Curé de Saint Estienne, *Ad Synodum*, dit-il, *veniet, nec tamen Circatam, vel Synodaticum reddet*. Ce qui marque que deslors on est demeuré d'accord, que ladite Paroisse de S. Estienne n'appartenoit point ausdits Religieux, puis qu'elle est distinguée du nombre & de la condition des autres Paroisses, qui estoient de la dépendance de ladite Abbaye.

On dit que par vn Bref du Pape Honoré III. de l'an 1221. la Paroisse de S. Estienne est qualifiée par lesdits Religieux, *Parochia eorumdem*, & que dans vn acte du 10. Novembre 1461. Pierre Abbé de S. Geneuiefue l'appelle *Capellam nostram*. 1. Factum pag. 17.

Mais de ce dernier acte, on n'en rapporte qu'une coppie non signée, laquelle ne peut estre veritable, comme il sera remarqué sur le VIII. chef des demandes desdits Religieux.

Et quant au Bref du Pape Honoré III. c'est vne piece secreete, faite au desceu & en l'absence de M. l'Euesque de Paris, du Curé & des Marguilliers de S. Estienne, dans laquelle lesdits Religieux ont peu inserer tout ce que bon leur a semblé : Et neantmoins il est fort difficile de s'imaginer que par ces mots, *Parochia eorumdem*, lesdits Religieux ayent entendu se dire Seigneurs & Superieurs de ladite Eglise, veu que vingt ans auparavant, par le Concordat du mois de Iuin 1202. ils n'auoient retenu en ladite Eglise, que la simple Presentation de la Cure ; mais les termes susdits ne signifient autre chose, sinon que la Paroisse de S. Estienne estoit en effect, la Paroisse de l'Abbaye, à laquelle les Domestiques & Officiers de la mesme Abbaye estoient subjects, comme il sera remarqué cy-apres sur le XVI. chef des demandes desdits Religieux.

Il est vray qu'apres la suite de trois siecles, lesdits Religieux s'estans persuadez, qu'ils auoient droit de s'emparer de ladite Paroisse par droit de voisinage & bien-seance, & que persone n'auoit cognoissance de la Sentence du Pape Innocent III. ny du Concordat fait en execution d'icelle, ils firent vn nouveau procez touchant ladite Paroisse, & la vendiquerent cōme estant vn membre de ladite Abbaye, & consequemment comprise

Transcript
à la fin du
1. Factum
des deffen-
deurs pag.
98.

dans l'Exemption d'icelle, pour raison dequoy s'estans pourueus aux Re-
questes du Palais, & par appel au Parlement de Paris, enfin par Arrest con-
tradictoire du 21. Iuillet 1512. lesdits Religieux furent maintenus en pos-
session de leurs droicts libertez, franchise & exemption pour tous les
lieux scituez dans le circuit & closture de ladite Abbaye, à l'exception
(porte l'Arrest) de l'Eglise Parochiale de S. Estienne, laquelle bien que
comprise dans l'ancienne closture des murs de ladite Abbaye, est decla-
rée sujete absolument à la puissance de l'Euesque, & ledit S. Euesque
comme *Diocesain, Pasteur & Superieur* de ladite Eglise, maintenu en la
possession des droits portez par ledit Arrest, & de tous autres concer-
nant la Cure des Ames, & l'administration Spirituelle de ladite Paroisse.

On veut prendre aduantage de ce que par ledit Arrest, les droicts de l'E-
uesque sont restraints à la Cure des Ames. Et neanmoins cette obseruatiō
est inutile, pource que la Proceſſion du Saint Sacrement, & la pluspart
des autres droicts dont lesdits Religieux font demande, regardent abso-
lument la Cure des Ames, & le Spirituel de ladite Paroisse: Et d'ailleurs
cette restriction a esté faite pour excepter de la puissance de l'Euesque, le
Temporel de ladite Paroisse, non point en faueur desdits Religieux,
ains seulement pour en laisser l'administration aux Marguilliers de ladite
Eglise, & la jurisdiction & cognoissance au Iuge seculier.

Transcripts
à la fin du
premier Fa-
ctum, pag.
104. 105. &
112.

Et si l'on veut considerer les actes de possession, les deffendeurs ont pro-
duit deux actes de Visites de ladite Eglise S. Estienne, faits es années. 1551.
& 1585. par lesquels Freres Philippes le Bel, & Ioseph Foulon qui ont esté
successiuement Abbez de S. Geneuiefue, & en mesme temps Curez Titu-
laires de S. Estienne, ont souffert en ladite qualité de Curez, les visitations
& remonstrances de M. l'Euesque de Paris, & présenté requeste audit S.
Euesque en qualité de Superieur de ladite Eglise. Et quand il a falu recon-
cilier les Coemetieres & autres lieux dependans d'icelle Eglise qui auoient
esté pollus, auctoriser les Confrairies, reduire les Fondations, reigler les
retributions des Messes, ordonner sur la police de l'Eglise, & le change-
ment du Seruice, pourueoir au retranchement & reparations des Coeme-
tiers, Consacrer & Dedier ladite Eglise, & faire publier les Indulgences en-
uoyees par le Pape, le tout a esté fait de l'auctorité de M. l'Euesque de Pa-
ris à l'exclusion desdits Religieux.

En la pro-
duction des
deffendeurs
B, C, & D.

1. Factum,
pag. 43. &
48.

On dit que quand les Marguilliers de S. Estienne ont fait des acqui-
sitions, & accepté des Fondations, ils ont requis le consentement de l'Ab-
bé de S. Geneuiefue. Mais de cinq cens Fondations, & autant d'autres
Contracts qui ont esté faits en l'Eglise de S. Estienne depuis quatre Siecles;
il ne s'en trouue que trois de ceste qualité, ausquels Freres Philippe le
Bel Abbé de S. Geneuiefue a esté appelé: Mais il estoit aussi Curé de

9
S. Estienne : Et d'ailleurs sa presence estoit necessaire en ces trois Contracts. Car le premier, c'est le Contract de la Fondation du 10. Octobre 1556. dont il a fourny les deniers: L'autre du mois de Feurier ensuiuant, c'est vn Contract de constitution qui contient l'employ des deniers de ladite Fondation, dont ledit le Bel s'estoit reserué la jouissance sa vie durant. Et le troisieme concerne la Fondation d'une Messe faite à la charge que le Chappellain seroit aggreé par l'Abbé de S. Geneuiefue, lequel a esté appellé audit Contract, pour tesmoigner qu'il acceptoit la charge qui luy estoit commise.

Si l'on s'est retiré par deuers lesdits Abbez, lors qu'il a fallu accroistre l'Eglise de S. Estienne, c'est qu'ils estoient proprietaires & Seigneurs Censiers du fonds dont on auoit besoing.

On veut prendre aduanrage de ce qu'en vne Assemblée de la Paroisse touchant le changement de l'Office en l'Eglise de S. Estienne, on auoit proposé d'en parler à l'Abbé de S. Geneuiefue: Mais cela est demeuré sans execution, & la requeste & ordonnance de M. l'Euesque qui est interuenue sur ce sujet, iustifie que cela a esté fait de son auctorité, sur la requeste du Curé & des Marguilliers, sans l'ordre & le consentemēt dudit Abbé.

1. Factum
pag. 50.

Transcript
enfin du 1.
Factum,
pag. 113.

Quand deffunct M. de Brichanteau a beny le petit Cœmetiere de S. Estienne, il l'a fait comme Euesque, avec la permission de l'Ordinaire, & non en qualité d'Abbé, d'autant que ce droit dépend de l'Ordre & de la puissance Episcopale.

Lesdits Religieux produisent quelques actes & memoires, faisans mention qu'autres fois ils ont pretendu sur la Cure de S. Estienne vingt liures de rente, & sur la Fabrique vne liure de cire vermeille; Mais quand ils auoient la premiere rente comme Patrons & Presentateurs de la Cure, & la seconde comme Seigneurs fonciers, ainsi qu'il est porté par lesdits extraits & memoires, cela ne feroit aucune consequence pour les droits dont est question: Et neantmoins l'un & l'autre article est demeuré aux termes d'une simple pretension; Car lesdits Religieux n'ont esté iamais seruis ni recognus desdites pretendues redevances. Et au contraire par le Contract de 1491. fait entre lesdits Religieux & les Marguilliers de S. Estienne, il est fait mention qu'il n'estoit deub à ladite Abbaye par la Cure de S. Estienne que dix sols parisis de rente, qui furent lors amortis.

1. Factum
pag. 412. &
46.

Transcript
enfin du 1.
Factum,
pag. 94.

Ils alleguent encores que le Curé de S. Estienne ne doit aucun droit de Procuration: Ce qui est veritable; mais cette exemption ne procede pas du priuilege de ladite Abbaye, car par le Concordat du mois de Iuin 1202. toutes les Cures dependantes de la mesme Abbaye sont sujettes à ce droit de Procuration: mais ledit Concordat a deschargé de cette prestation la Cure de S. Estienne, à cause qu'elle s'est trouuée renfermée dans

1. Factum
pag. 35. IX.

la closture de la Ville, d'autant que ce droit n'a esté estably que pour soulager la despense que les Euesques sont obligez de faire en leurs Visites : & dans l'usage, & par les Arrests des Cours Souueraines il n'a iamais esté leué sur les Curez de ceste ville, ny des autres villes Episcopales.

*Curez
Primi-
tifs.*

Et partant, il faut demeurer d'accord que le droit de Superiorité pretendu par lesdits Religieux sur l'Eglise de S. Estienne est purement imaginaire, & qu'ils n'en ont ny tiltre ny possession.

Et pour ce qui concerne la pretendue qualité de Curez Primitifs, elle n'est en usage que pour les Cures où il y a des Vicaires perpetuels, & est extraordinaire en l'ordre des Chanoines Reguliers de S. Augustin qui deseruant les Cures en personne, cōme Prieurs-Curez: Et aussi les deffendeurs rapportent plus de cent actes faits avec lesdits Religieux pour ladite Paroisse de S. Estienne, par lesquels ils ont donné au Curé de S. Estienne le tiltre de Curé & de Prieur Curé, & dans toutes les pieces produites de part & d'autre, il ne s'en trouue vne seule dans laquelle lesdits Religieux ayent pris cette pretendue qualité de Curez Primitifs.

On dit que lesdits Religieux iouissent des Dixmes des heritages seiz à Grenelle, qui dependent de la Paroisse de S. Estienne, & qu'ils payent les Decimes pour le Curé de ladite Paroisse.

Mais la plus ancienne quittance desdits Decimes que l'on rapporte, est de l'an 1633. & s'il s'en trouue de plus anciennes, il faut que ce payement commun des Decimes pour l'Abbaye & pour la Cure de S. Estienne ait commencé du temps que les Abbez de S. Geneuiefue ont retenu entre leurs mains la Cure de S. Estienne: Et depuis que ces deux Benefices ont esté possedez separement, l'Abbé & le Curé de S. Estienne qui craignoient en diuisant leurs Decimes, de donner cause à vne surtaxe, se sont accommodez ensemble, en telle sorte, que moyennant le delaissement fait à l'Abbaye de la iouissance des Dixmes de Grenelle, l'Abbé s'est chargé de payer les Decimes pour le Curé de S. Estienne, & de luy fournir encores par chacun iour vne portion de Religieux, lequel accommodement qui n'est que momentanée, & pour autant de temps que l'on trouuera bon de l'entretenir, ne peut rien adiouster ny diminuer aux droits & prerogatiues des deux Eglises.

Et quand on voudroit accorder ausdits Religieux ceste qualité de Curez Primitifs, qui a esté iusques à present incogneue, & les admettre en ceste qualité à la Procession du S. Sacrement, ils seroient obligez de marcher sous la Banniere, la Croix & le Ciboire de S. Estienne, & se ioindre au Clergé & au corps de ladite Paroisse, pource que la qualité de Curé Primitif, n'est point considerable hors la Paroisse.

Et d'ailleurs chacun sçait que la qualité de Curé Primitif ne peut

1. Factum,
pag. 35. III.
Soubs A, B,
C, D, E, G,
& I.

En la pro-
duction des
deffendeurs:
L. 6. piece.

donner autres droicts & aduantage, que ceux qui ont esté reseruez audit Curé Primitif par vn tiltre particulier, ou par vne possession legitime & prescrite: Et de fait la Sentence & l'Arrest donnez au profit du Chapitre de S. Marcel contre le Curé de S. Hypolite, qui sont en la production desdicts Religieux, n'ont adiugé audit Chapitre autres droicts que ceux desquels il estoit en possession actuelle. Or de tous les droicts pretendus par lesdicts Religieux sur la Paroisse de S. Estienne, ils n'en ont, ni tiltre ni possession, & au contraire le Concordat de l'an 1202. fait au temps de la naissance de ladite Paroisse de S. Estienne, ne reserue à leur profit, que la simple Presentation de la Cure, & fait cognoistre que toutes leurs pretensions sont friuoles & temeraires.

Lesdicts Religieux taschent d'insinuer par leur Factum, que la Cure de S. Estienne n'est qu'une simple Obedience & Commission dependante de ladite Abbaye: mais ils n'ont osé former ceste demande, d'autant qu'il y a dans l'instance, plus de deux cents actes, qui iustificient que ladite Cure est vn benefice perpetuel, & que depuis quatre siecles & plus, elle a esté perpetuellement deservie par des Curez Titulaires, & eux-mesmes ont produit vn acte de Presentation fait par leur Abbé à M. l'Euesque de Paris dès l'année 1444. d'un Religieux de leur Maison, pour estre pourueu de ladite Cure en tiltre.

Lesdicts Religieux prennent aussi le tiltre de Patrons & Fondateurs de ladite Eglise de S. Estienne: mais il est certain par la disposition Canonique au Can. *Eleutherius* 18. *quest.* 2. & au chap. *Praterea*. De iure Patron. que les Patrons n'ont autres droicts & prerogatiues que celles qui ont esté par eux retenues expressement lors de la fondation des Eglises. Et partant, quand lesdicts Religieux seroient veritablement Patrons & Fondateurs de l'Eglise de S. Estienne, ils ne pourroient demander que la simple Presentation de la Cure, comme estant en effet, le seul droict qui leur a esté reserué par le Concordat de l'an 1202. fait au temps de l'establissement de ladite Paroisse.

Et neantmoins ceste question est inutile, d'autant que lesdicts Religieux ne montrent point qu'ils ayent donné le fonds, ni rien contribué pour la construction & dotation de ladite Eglise: Et au contraire, les defendeurs ont iustifié par escrit que le fonds de leur Eglise a esté achepté, & les bastiments & accroissements d'icelle faits aux despens des Paroissiens.

Il est vray que par le Bref du Pape Honoré III. de l'an 1221. dont a esté parlé cy-dessus, les Religieux de S. Geneuiefue ont demandé permission de faire bastir l'Eglise Parochiale de S. Estienne, hors l'enclos de leur Abbaye: Mais pource que, par le Concordat du mois de Juin 1202. il auoit esté conuenu quel'Euesque ne pourroit sans le consentement desdits Re-

En la production des demandeurs sous C, 10. piece.

Patronage & fondation.

En la production des defendeurs sous I.

1. Factum, pag. 37. II.

ligieux, ny lesdits Religieux sans le consentement de l'Euesque, faire construire vne nouvelle Eglise Parochiale, par ledit Bref, le Pape a renuoyé à l'Euesque, la Requête desdits Religieux, lesquels n'ont point voulu communiquer ce qui a esté fait & ordonné par l'Euesque en execution de ce Bref, pour ce qu'il est croyable, que l'Euesque a reietté leur Requête, & empesche la construction qu'ils vouloient faire de ladite Eglise Parochiale, à l'effect de se rendre maistres de ladite Eglise, & faire reuiure leurs anciennes pretensions dont ils auoient esté deboutez par ledit Concordat, & par la sentence du Pape Innocent III.

Mais ladite Paroisse a esté premierement bastie, & depuis accreuë & mise au point où elle se void aujourd'huy, aux despens des seuls Paroissiens. Et ceste verité est confirmée par vn contract de Bail à rente de l'an 1491. fait entre l'Abbé & les Religieux de S. Geneuiefue, & les Marguilliers de S. Estienne, touchant l'accroissement de leur Eglise, dans lequel quand on parle des premiers bastiments de ladite Eglise Parochiale, on ne dit point qu'elle appartienne ausdits Religieux, ny qu'elle ait esté par eux construite, & au contraire toutes les clauses dudit contract portent, que c'est l'Eglise des Marguilliers & de la Paroisse, & ensuite on adioute que les Marguilliers de S. Estienne iouiront des lieux y mentionnez, *comme de leur chose & appartenances de leur Eglise*, qui est vne marque évidente qu'elle a esté fondée & construite à leurs despens.

Et quant à la qualité de Seigneurs temporels prise par lesdits Religieux, il est vray que l'Eglise de S. Estienne est bastie dans la censue, fief & Iustice desdits Religieux; mais cette circonstance ne leur peut donner autre prerogative, sinon de marcher les premiers à la Procession entre les Seculiers & Paroissiens; & comme en cela *funguntur vice Laicorum*, il est inouï & sans exemple, qu'un Seigneur Iusticier ait iamais pretendu d'ordonner & disposer de la Procession du S. Sacrement, d'Officier aux Festes du Patron, d'inhummer les corps de ses Iusticiables, & de faire les autres fonctions contenues en leurs demandes à l'exclusion du Curé.

Et pour ce qui concerne la personne de Frere Martin Cytolle Curé de S. Estienne, lesdits Religieux ont supposé & publié par leur Factum, que ledit sieur Cytolle veut secotier le joug de Religieux; mais ils font paroistre en cela leur aigreur & mauuaise foy: car chacun sçait, & lesdits Religieux sont eux-mêmes contraints d'aduouer cette verité en vn autre endroit de leur Factum, que ledit sieur Cytolle a tousiours gardé fort exactement son habit & son vœu de Religion, & n'a iamais desnié que comme Religieux, il ne soit subiet à la Iurisdiction de Monseigneur le Cardinal de la Roche-foucault son Abbé; mais cela ne peut donner ausdits Religieux aucune auctorité sur ladite Paroisse. Car premierement par les

termes

Sei-

gneurs
tempo-
rels.

Iuris-

diction

Tempo-

relle &

Spiritu-

elle, sur

le Curé

de S.

Estien-

ne.

termes du Concordat du mois de Iuin 1202. la Cure de S. Estienne n'est point affectée nécessairement aux Religieux de S. Geneuiefue, & peut estre possédée par d'autres personnes, & par le Reiglement de la Reforme de ladite Abbaye, qui a esté confirmé par le Pape, & autorisé par Lettres patentes du Roy, verifiées au grand Conseil, lesdits Religieux ont esté declarez incapables de deservir & tenir aucunes Cures: Et quand ladite Cure de S. Estienne, seroit tousiours 'entre les mains d'un Religieux de S. Augustin, lesdits Religieux de S. Geneuiefue sont contrains de reconnoistre eux-mesmes, qu'en ce qui regarde les droits & les fonctions de ladite Cure, le Curé d'icelle n'a point d'autre Chef & Superieur que M. l'Archeuesque de Paris, & les Arrests donnez avec Frere Jacques le Febure, & Jacques Comtesse, les 24. Decembre 1424. & 10. Aueil 1510. n'ont rien prejuge contre cette proposition.

Factum,
P. 33.

Et partant il faut conclurre, que lesdits Religieux n'ont aucun tiltre general ny particulier de leurs demandes.

Et si l'on veut examiner la possession, il est inouï que lesdits Religieux ayent iamais ordonné ny disposé de la Proceffion du S. Sacrement, au iour de la Feste-Dieu en la Paroisse de S. Estienne. Mais c'est vn droit purement Episcopal, & la disposition de ladite Proceffion est tousiours demeurée à M. l'Archeuesque de Paris, & sous son autorité, au Curé de ladite Paroisse.

1. Chef de
demandes
desdits Re-
ligieux.

Factum p.
12. & 16.

Lesdits Religieux disent, que c'est la Proceffion de l'Abbaye: & à cette fin ils se seruent d'un certificat du 17. Ianuier 1505. & de l'extrait d'un Registre de la Paroisse, qu'ils appellent l'Ordre de la Proceffion de l'an 1573. qui est le premier acte faisant mention de la jonction des deux Eglises.

Mais ledit certificat est vne piece informe, qui peut auoir esté fabriquée apres coup. Et d'ailleurs elle est de nul effect en ce qu'elle vient de personnes affidées, qui ont engagé volontairement leur foy sans ordonnance & assignation precedente, & sans serment prealable. Et si on considere les personnes desnommées audit certificat, & les faits dont ils ont depose, c'est le Curé du village de Brueil, dont l'Abbé de S. Geneuiefue est Seigneur, vn autre Prestre, vn Aduocat, quatre Bouchers, & vn Cordonnier, qui rapportent outre le fait susdit quantité d'autres choses contraires à la possession & à la verité des pieces produites en cette instance, mesmes d'un contract & transaction faite pardeuant Notaires le 7. Iuillet 1506. entre l'Abbé & les Religieux de S. Geneuiefue, & Frere Estienne Comtesse lors Curé dudit S. Estienne, touchant les droits de la Cure de S. Estienne.

Factum p.
41.

Et quant à l'extrait & Ordre de la Proceffion de l'an 1573. l'induction que l'on en tire est contraire au texte de la piece, car elle porte expressement que c'est la Proceffion de la Paroisse, & quel Abbé & les Religieux de S.

Transfert
à la fin de
Factum.
95.

Geneuiefue affistent à ladite Procession, & l'Ordre de la mesme Procession de l'an 1609. parle aussi de la Procession & de la Croix de S. Estienne, & aussi c'est le S. Sacrement consacré en la Paroisse, qui a esté porté en ladite Procession, par les Prestres d'icelle, sous vn Daix appartenant à la Fabrique de ladite Eglise, le Daix porté par des Paroissiens, les Marguilliers ont assisté & pris place aux quatre coins du Daix, ayans en main des Verges dorées pour marque de leur autorité, les Prestres de S. Estienne ont offert l'encens aux Stations, & chanté les Antiennes & Respons mesmes dans ladite Eglise de S. Geneuiefue, & ne s'est iamais veu en ladite Procession autre Croix & Banniere que celles de la Paroisse. Ce qui montre que c'est en effect la Procession de la Paroisse, & que toute l'autorité & direction, & les prerogatiues d'icelle sont demeurées au Curé, & à l'Eglise de saint Estienne.

Lesdits Religieux veulent prendre aduantage de certains extraicts pris sur les Registres de leur Pitancerie, qui font mention que depuis l'an 1596. frere Ioseph Foulon a fait donner des retributions en argent à des Prestres, sçauoir à deux pour auoir porté la Croix, à quelques vns, pour auoir porté le Sainct Sacrement, & à d'autres sans auoir exprimé la cause, mais les originaux desdits Registres sont sans ordre, & sans signature, & à la premiere inspection d'iceux, il est aisé de iuger qu'il y a plusieurs additions faictes apres coup; & neantmoins il ne se trouue vn seul desdits Registres faisant mention de la Croix de Sainte Geneuiefue: & supposé qu'ils soient veritables, les sommes y mentionnees doiuent estre considerees, comme des gratifications volontaires faictes par ledit Foulon Curé, aux Prestres de la Paroisse, qui ne peuuent donner aucun aduantage à ladite Abbaye, attendu mesme que les deffendeurs ont fait voir en leur production, que de temps immemorial, les Prestres qui ont porté le Sainct Sacrement en la Procession de la Feste-Dieu, ont esté stipendiez annuellement par les Gouverneurs, & des deniers de la Confrairie du S. Sacrement de la Paroisse. Et par la Declaration faicte à la requeste desdits Religieux par Maistre Iean Mordant, à present Vicair de S. Paul, & cy-deuant habitué à S. Estienne: il est fait mention qu'il a plusieurs fois aydé à porter le S. Sacrement en ladite Procession de la Feste-Dieu, sans auoir receu aucun salaire ou retribution de la part desdits Religieux. Pour le fait du Soleil ou Ciboire, & de la Saincte Hostie, il est constant par tous les interrogatoires desdits Religieux & des Curé, Prestres & Paroissiens de S. Estienne produits par lesdits Religieux, que depuis qu'il y a eu en l'Eglise de S. Estienne vn Soleil digne de ceste ceremonie, mesme durant les vingtcing années dernieres, auant & depuis la Reforme de ladite Abbaye, on n'a veu en ladite Procession du S. Sacrement autre Hostie, Soleil & Ciboire que celuy de S. Estienne.

Et pour ce qui concerne la iunction des Clergez des deux Eglises, & l'ordre que le Curé & les Prestres de S. Estienne doiuent tenir en ladite Procession, lesdits Religieux ont produit vn ancien Chartulaire ou Registre de leur Abbaye de l'an 1381. qui contient fort exactement, & par le menu l'ordre & les ceremonies qui auoient accoustumé d'estre gardées en la Procession du S. Sacrement de l'Eglise de S. Geneuiefue au iour de la Feste Dieu, & lequel neantmoins ne fait aucune mention du Curé, ny des Prestres de S. Estienne, laquelle circonstance qui est tres importante & considerable n'eust point esté obmise, si en ce temps-là lesdites Eglises n'eussent fait qu'une seule & mesme Procession.

III. chef.

Mais tout l'aduantage que lesdits Religieux veulent tirer dudit Registre consiste en ce qu'il porte que les Abbé & Religieux de S. Geneuiefue faisoient la Procession par leur terre. Et au contraire ceste remarque fait cognoistre que chacune Eglise faisoit sa Procession separée, d'autant que la Procession de S. Estienne a tousiours passé par les ruës saint Jacques, saint Iean de Latran, saint Iean de Beauuais, des Anglois, Gallande & du Feurre, & vers le paue, & les grands Degrez, qui ne sont point de la censue & Iustice de ladite Abbaye.

Mais enuiron l'an 1573. Frere Ioseph Foulon qui estoit Abbé de sainte Geneuiefue, & Curé titulaire de S. Estienne, ayant fait trouuer bon à ses Parroissiens de receuoir à leur Procession les Religieux de ladite Abbaye, afin que comme chef de l'une & l'autre Eglise, il peust conduire conioinctement les deux Clergez d'icelles. Il est vray que depuis ce temps, les Prestres de la Parroisse, & les Religieux de Sainte Geneuiefue se sont ioincts ensemble en ladite Procession du S. Sacrement au iour de la Feste Dieu.

Mais le temps qui a couru iusques au deceds dudit Frere Ioseph Foulon arriué en 1607. n'est point considerable, parce qu'ayant tousiours retenu entre ses mains la Cure de S. Estienne, c'est en ceste qualité de Curé qu'il a ordonné de ladite Procession, & qu'il s'est donné l'autorité avec le consentement de ses Parroissiens d'y admettre lesdits Religieux.

Et si depuis ladite annee 1607. en laquelle a cessé l'abus de tenir conioinctement l'Abbaye & la Cure, on a trouué bon de continuer par souffrance la mesme possession, ce qui a esté fait innocemment de part & d'autre, par vn pur sentiment de deuotion, ne peut induire pour l'aduenir vne obligation perpetuelle & necessaire, mesme lors que l'on void que les nouueaux Religieux de Sainte Geneuiefue veulent faire profit de tout, pour asseruir le corps de la Parroisse à des subiections auxquelles leurs predecesseurs n'auoient iamais pensé. Ioinct que depuis ladite an-

Factum,
pa. 15.

née 1607. iusques au iour du trouble arriué en 1639. il ne se trouue que trente deux années d'interualle. qui n'est pas vn temps suffisant entre Ecclesiastiques, pour former vne prescription complete, sans laquelle vne simple possession ne peut donner à des Religieux vn droit qui ne leur appartient point originairement. Et auourd'huy les choses sont reduites à ce poinct, que pour establir la paix & l'vnion entre les deux Eglises, il est necessaire qu'elles fassent séparément leurs Processions, comme il a esté obserué de tout temps au iour de l'Octau de la Feste Dieu, & a esté practiqué pour le iour de la Feste Dieu, auant l'an 1573. & depuis cinq ans, sans trouble ny confusion. Car les violences & entreprises desdits Religieux obligent les deffendeurs de se deffier de toutes leur actions & propositions, & comme il est impossible de pouruoir par vn reiglement à toutes les difficultez qui peuuent suruenir, s'il falloit assembler à l'aduenir les deux Eglises pour ladite Procession du S. Sacrement, on verroit tous les ans quelque nouueau subiect de contention, desordre & scandale.

Et au reste lesdits Religieux n'auront point subiect de se plaindre, quād suiuant l'obligation de leur vœu, ils demeureront renfermez dans leur Cloistre pour y faire leur Procession: Et puis que par les articles de leur Reforme ils ont abandonné la conduite des Cures dependantes de leur Abbaye afin de maintenir entr'eux avec plus de circonspection l'obseruance de la discipline religieuse, ils ne deuroient point rechercher avec tant d'opiniastreté de paroistre en la Procession d'une Eglise, en laquelle ils n'ont aucun droit, parmi tant de seculiers de l'un & l'autre sexe.

Et au contraire M. l'Archeuesque de Paris receuroit vn notable preiudice en ses droits, si lesdits Religieux estoient auctorisez par Arrest de faire la Procession avec la Parroisse de S. Estienne qui est subiecte absolument & immediatement audit Sieur Archeuesque: & plus encores si en ceste solennité annuelle & ordinaire, le Conseil donnoit à l'Abbé de S. Geneuiefue, comme il pretend, le pouuoir de faire monstre par les rues mesme hors le destroict de sa Iustice temporelle, de sa Mitre, & de ses autres habits Pontificaux dont l'vsage ne luy a esté concedé que dans l'enclos de son Abbaye, & lesquels il n'a droit de porter ailleurs, sinon lors de la ceremonie extraordinaire de la descente de la Chasse de S. Geneuiefue.

On demeure d'accord que quād les deux Eglises ont esté vnies ensemble, le Clergé de la Parroisse a suivi la Croix, & permis que les Religieux & l'Abbé de S. Geneuiefue ayent marché les derniers, qui est pour l'ordre le rang plus honorable és Processions. Mais il est constant que l'Abbé n'a iamais entrepris de porter la Chasuble, qui est neantmoins l'ornement ordinaire duquel les Chefs de chacune Eglise, mesme les Euesques sont ro-

uestus en ceste ceremonie en laquelle on fait vne commemoraison publique & solennelle du S. Sacrement de l'Autel, mais ils s'est contenté d'une simple Chappe, pource qu'en effect il n'estoit point le Chef de la Procession.

Et d'ailleurs chacun demeurera d'accord qu'en la Procession du S. Sacrement la place d'honneur est celle qui approche de plus près le Daix, & par ceste raison en toutes les autres Eglises ceux qui ont la conduite & la preface en ladite Procession, portent eux mesmes, ou suivent immédiatement le S. Sacrement. Et d'autant qu'en la Procession de S. Estienne les Religieux de S. Genevieve ont désiré marcher les derniers, on a esté contraint d'y establir vn ordre tout particulier, & au lieu qu'és autres Eglises le Clergé precede le S. Sacrement, en la Paroisse de S. Estienne depuis que les Religieux de S. Genevieve ont commencé d'assister à ladite Procession, le S. Sacrement a esté porté en teste dudit Clergé de S. Estienne, afin de luy donner par ce moyen l'advantage de la preface par dessus l'Abbé & les Religieux de S. Genevieve.

Pour le fait particulier du Curé de S. Estienne, il est vray que quelquefois il a pris son rang de profession dans le corps desdits Religieux afin de les conuier par ceste deference de ne point faire difficulté de se soumettre & ioinde à la Procession de sa Paroisse. Mais en d'autres années mesmes lors que Messieurs les Nonces qui ont leur Hostel dans le destroit de ladite Paroisse, ont assisté à ladite Procession, le Curé de S. Estienne a pris son rang avec ledit Sieur Nonce immédiatement apres le Daix. Ce qui suffit pour conseruer son droit & sa possession, & fait cognoistre que quand il a pris vn moindre rang, ceste soumission estoit volontaire, & que comme Supérieur & Chef de ladite Procession, ils s'est donné telle place que bon luy a semblé.

Lesdits Religieux demandent que ladite Procession marche sous la Croix seule de S. Genevieve, laquelle pretension est contraire à la possession, car l'on n'a jamais veu en ladite ceremonie autre Croix que celle de la Paroisse, & lesdits Religieux auoient eux mesmes que c'est le Clerc de S. Estienne qui a porté la Croix en ladite Procession, mais ils disent qu'il se seruoit de la Croix de S. Genevieve, ce qui n'est ny veritable ny vraysemblable, mais par l'ordre de ladite Procession de l'an 1609. qui a esté extraict sur les Registres de S. Estienne, & par quantité d'autres actes produits par les defendeurs, il est fait expresse mention que l'on a tousiours porté en ladite Procession la Croix seule de S. Estienne.

Pour le cinquiesme chef, par lequel lesdits Religieux insistent à tenir le Chœur pendant le cours de ladite Procession, & que l'un d'eux porte le Baston de Chantre, & commence les Antiennes & Respons: C'est aussi

une pretension nouvelle, car comme c'est la Procession de la Paroisse, le Chant est tousiours demeuré au Clergé de S. Estienne: Et pour ce qui concerne le Balton de Chantre, les ordres & Registres de ladite Procession faits és années 1573. & 1609. n'en font aucune mention: & lesdits Religieux ont esté contraints de recognoistre par leurs interrogatoires, qu'auant l'année 1616. il ne s'estoit veu aucun Balton Cantoral en leur Eglise.

vi. Chef
1. Factum
p. 19.

Pour les Baltons dorez que les Marguilliers de S. Estienne ont accoustumé de porter aux quatre coings du Daix durant le cours de la Procession, mesme dans l'Eglise de S. Geneuiefue, cet vsage est commun à plusieurs autres Eglises, & est fort ancien en ladite Eglise S. Estienne, comme il appert par les ordres & Registres de ladite Procession, és années 1537. & 1609.

Lesdits Religieux ont produit les Interrogatoires de certains Prestres & Paroissiens de S. Estienne qu'ils ont fait ouyr sur certains faicts & articles: mais il y a double nullité esdites Interrogatoires: l'une, en ce qu'ils ont esté requis & rendus auant que l'affaire eust esté retenue au Conseil, & l'autre en ce que les particuliers qui ont esté ouys, ne furent iamais parties en l'instance, qui est vn tesmoignage tout euident de leur pratique & collusion, d'autant qu'ils n'estoient point obligez de subir lesdits Interrogatoires, comme il a esté iugé par Arrest du Conseil du mois de Iuillet 1640. Et neantmoins quand ils seront conferez avec celui du Curé de S. Estienne, & avec l'acte & Declaration faite par deuant Notaires à la requisition de l'Abbé de S. Geneuiefue par Maistre Iean Mordant & Laurent Rodigon Prestres, qui contient exactement l'ordre qui a esté de tout temps obserué en ladite Procession du S. Sacrement, le Conseil recognoistra que les pretensions desdits Religieux sont autant de nouveautez & entreprises qu'ils veulent faire sur les droicts de la Paroisse.

vii. Chef
1. Factum p. 21

La septiesme demande, concernant les conuois & enterremens esquels leudit Religieux estans inuitez, veulent porter l'Estole, & faire les autres ceremonies à l'exclusion du Curé, est encore plus extraordinaire, car la sepulture est vn droit Curial & Parochial, auquel lesdits Religieux ne peuuent rien pretendre, puis que par la sentence du Pape Innocent III. de l'an 1201. par le Concordat de l'an 1202. & par l'Arrest de l'an 1512. tous les droicts Parochiaux de l'Eglise S. Estienne sont demeurez à l'Euesque pour en faire la fonction & exercice par le ministere du Curé à l'exclusion desdits Religieux. Et dans l'vsage tant s'en faut que lesdits Religieux ayent iamais pensé à faire demande de ce droit, au contraire on a produit quantité d'actes qui iustifient que le Curé de S. Estienne a

En la production des
descendants
sous E.

fait sans contredit toutes les fonctions Curiales mesme pour les sepultures priuatiuement ausdits Religieux : & si quelquefois lesdits Religieux ont leué les corps de quelques vns de leurs Officiers, ils ne l'ont iamais entrepris qu'auec la permission du Curé de S. Estienne, lequel a tousiours fait auec son Clergé les conuois & enterrements de personnes laïques decedees dans ladite Abbaye comme estans du nombre des Paroissiens

Pour le regard de l'assistance à l'eslection des Marguilliers & la reception du serment, on veut se seruir d'un Arrest du 3. Iuillet 1399. qui a rendu à l'Abbé de S. Geneuiefue vn Marguillier que l'Euesque de Paris auoit fait mettre en ses prisons : mais ce particulier n'estoit pas Marguillier de la fabrique de S. Estienne, ains du nombre des 26. seruiteurs de ladite Abbaye dont il est parlé dans le Concordat du mois de Iuin 1202. l'un desquels porte le nom de *Matricularius*.

Dans vn acte du 10. Nouembre 1451. Pierre Abbé de S. Geneuiefue a enoncé que l'institution des Marguilliers de S. Estienne luy appartenoit, mais on ne rapporte qu'une copie non signee de ceste piece qui a esté fabriquée apres coup, & pour monstrier qu'elle n'est point veritable, c'est que par icelle on dit que la collation de la Cure de S. Estienne appartenoit audit Abbe, & qu'il a donné gratuitement aux Marguilliers de S. Estienne vne portion de l'Infirmierie de ladite Abbaye pour accroistre leur Eglise : & neantmoins il est constant que les Abbez de S. Geneuiefue n'ont iamais eu ni pretendu depuis le Concordat de l'an 1202. que la simple presentatiō de ladite Cure, & non la collation d'icelle : & pour le fait de l'Infirmierie les defendeurs ont iustifié que par vn cōtract de l'an 1491. qui sont 30. ans apres l'acte dont il s'agist, lesdits Marguilliers ont pris à rente d'un autre Abbé le mesme fonds que l'on a supposé par ledit acte auoit esté donné & concedé à la fabrique de S. Estienne, & par là on peut iuger quelle foy on peut adiouster à la copie dudit acte.

On rapporte encores deux actes de 1537. & 1538. faisans mention que F. Philippes le Bel, Abbé de S. Gerueufue a assisté à l'eslection des Marguilliers de ladite Eglise, & que les Marguilliers esleus ont presté le serment.

Mais ledit le Bel estoit de flos pourueu de la Cure de S. Estienne, & c'est en ceste qualité qu'il a esté appellé à l'eslection desdits Marguilliers, & qu'il a receu leur serment. Et neantmoins pour le faict de ladite prestation de serment, ces deux actes n'ont point eu de suite, comme aussi ceste pretension est extraordinaire contre le droit commun, & l'usage obserué de tout temps en l'Eglise de S. Estienne, & aux autres Paroisses de ceste ville, & condamnée par Arrest du Parlement de Paris du 2. Decembre

vnt. Chef
1. Factum p.
2032.

Transcrit à
la fin du 1.
Factū p. 94.

En la pro-
duction des

defendeurs 1539. qui a fait deffenses aux Marguilliers des Paroisses, comme estans
aux pieces administrateurs laïques de faire le serment entre les mains d'aucunes
adioust ces personnes Ecclesiastiques, non pas mesmes des Euesques & des Curez.

ix. Chef
1. Factum p.
21.

1. Factum p. 55

On ne peut aussi monstrier que lesdits Religieux ayent iamais assisté à la reddition des comptes de la fabrique de S. Estienne, mais ceste demande est fondée, *Primò*, sur la copie non signée d'un prétendu acte de Pierre Abbé de S. Genevieve du 10. Nouembre 1461. qui ne peut faire foy pour les raisons remarquées contre le precedent chef de demande: *Secundò*, sur un prétendu acte de notoriété du 17. Ianvier 1505. qui a esté pareillement destruit sur le premier chef desdites demandes: *Tertiò*, sur un compte de l'an 1554. que l'on dit auoir esté rendu par deuant F. Philippes le Bel Abbé: mais en ce temps-là ledit le Bel estoit aussi Curé de S. Estienne, & est necessaire qu'il ait assisté audit compte en ladite qualité de Curé, d'autant que hors que ledit le Bel, & Frere Ioseph Foulon son successeur qui ont esté Curez de S. Estienne, il ne se trouue qu'aucun Abbé ou Religieux de S. Genevieve ayent esté appelez à l'audition des comptes de ladite Paroisse.

x. Chef
1. Factum p.
21. & 73.

Pour le choix du Predicateur du Carefme on produit vn contract du mois de Ianvier 1602. par lequel F. Ioseph Foulon Abbé de S. Genevieve a donné à la fabrique de la Paroisse vne somme 2400. liur. pour faire vn fonds de 200. liur. de rente destinee par le mesme contract à la retribution du Predicateur de Carefme, à la charge que de deux Predicateurs qui seroient presentez par chacun an par les Marguilliers de ladite Eglise, l'Abbé Foulon & ses successeurs Abbez Religieux Profez de l'Abbaye de S. Genevieve auroient la faculté de choisir celuy que bon leur sembleroit.

Le reueny de ceste somme ne suffit pas à present pour payer le quart de ce que l'on donne tous les ans au Predicateur du Carefme. Et de plus le choix dudit Predicateur n'est pas reserué indifferemment à tous les Abbez de S. Genevieve, ains seulement à ceux qui seroient Profez de la mesme Maison, laquelle qualité ne se rencontre point en la personne de Fr. Charles Faure: & ce qui met ce poinct hors de toute difficulté, c'est que le choix dudit Predicateur qui appartient ausdits Marguilliers sous l'auctorité & par la concession de Messieurs les Euesques de Paris, n'a peu estre transferé valablement à vne tierce personne sans l'adieu & auctorité desdits Sieurs Euesques: Et aussi il ne se trouuera point que depuis ledit contract F. Ioseph Foulon & ses successeurs Abbez ayent vísé de ce droit qui est à present prescript.

xi. Chef.
1. Factum p. 21

L'onzième demande concerne la benediction des Predicateurs en la Paroisse de S. Estienne, qui est vn droit nouveau à l'esgard desdits Religieux

gieux duquel ils n'ont iamais iouy, & au contraire les deffendeurs ont iustificié que le Curé de S. Estienne est en possession de donner la benediction ausdits Predicateurs mesmes dans l'Eglise de S. Geneuiefue, lors qu'il y a conduit sa Paroisse en Procession, car comme la charge de la predication appartient à l'Euesque, & que par la sentence du Pape Innocent 3 de l'an 1201. & le Concordat de l'an 1202. on a conserué à l'Euesque à l'exclusion desdits Religieux, mesme au temps que la Paroisse de S. Estienne estoit deseruiue dans l'Eglise de S. Geneuiefue *omne ius Episcopale, seu Parochiale in tota Parochia de Monte*, il n'y a que l'Euesque, & en son absence le Curé de S. Estienne qui puisse legitiment donner la benediction aux Predicateurs de ladice Paroisse.

Pour la premiere place demandee par lesdits Religieux dans l'oeuvre de l'Eglise de S. Estienne ils n'ont aussi ni titre ni acte du possession, ni aucune qualité qui leur puisse donner ceste prerogative. xii. chef.
1. Factum
P. 22.

Et en ce qui concerne l'office des deux Festes du Patron de l'Eglise de S. Estienne, on se sert d'un extrait de Registre de l'an 1573 qui fait mention que la vigile de la Feste de S. Estienne au mois d'Aoust, les Religieux de S. Geneuiefue tenoient le Chœur, & chantoient les Vespres & Matines: mais c'estoit en un tems auquel F. Ioseph Foulon Abbé estoit Curé & en ordonnoit ainsi que bon luy sembloit. Depuis son decez & long tēps au parauant on n'a point veu lesdits Religieux en ladite Paroisse, & est constant par les propres interrogatoires desdits Religieux, que depuis leur reforme, & mesme depuis l'an 1608 c'est à dire de tout le temps de leur cognoissance, lesdits Religieux ne se sont iamais presentez pour faire l'Office en ladite Paroisse. xiii. xiv. &
xv. chef
1. Factum p.
23. & 64.

Et pour le fait particulier de l'Abbé, il est vray que du temps que F. Ioseph Foulon estoit Abbé de S. Geneuiefue, & Curé de S. Estienne, il a officié plusieurs fois aux Festes du patron en ladite Eglise, mais il l'a fait en qualité de Curé, & non comme Abbé de S. Geneuiefue. Et depuis que la Cure & l'Abbaye ont esté en diuerses mains, Monsieur le Cardinal de la Rochefoucaut, & Monsieur Brichanteau son predecesseur n'ont dit que deux fois en ladite Eglise S. Estienne la Messe Parochiale aux Festes du Patron, & ce apres en auoir esté inuitez par honneur, non point comme Abbez, ains à cause de leur dignité Episcopale, comme en d'autres années Messieurs les Cardinaux Bichi & Bani ont fait le semblable lors qu'ils residioient en ceste ville en qualité de Nonces de la Sainteté: Et durant l'Office lesdits Seigneurs de la Rochefoucaut & de Brichanteau ont esté assis par les Diacre, Sousdiacre & autres Prestres de la Paroisse, & non par aucun Religieux de S. Geneuiefue, lesquels n'eussent manqué de prendre part en ladite ceremonie, s'il eust esté question d'un droit appartenant à ladite Abbaye.

xvi. chef.
1. Factum p.
24.
En la pro-
duction des
defendeurs
sous B.

La seiziesme demande regarde les conuoi & enterremens des personnes laïques demeurantes en ladite Abbaye, ce qui est facile à regler: car si on considere l'usage & la possession, les defendeurs ont iustifié par escrit, que les seruiteurs & domestiques, & les autres seculiers residans en ladite Abbaye ont tousiours esté considerez, comme Paroissiens de S. Estienne, qu'apres leurs deceds leurs corps ont esté leuez sans contredit par le Curé & les Prestres de S. Estienne, que les nepueux de defunct Monsieur de Brichanteau precedent Abbé, & les autres enfans des personnes mariees residantes dans ladite Abbaye ont esté baptisez sur les Fonts de S. Estienne: Et lors qu'à la Feste de Pasques Monsieur le Cardinal de la Rochefoucaut a desiré administrer la Communion à ses Officiers & domestiques, il en a pris la permission du Curé de S. Estienne. Et en l'annee 1642. les Prestres de S. Estienne ont encores administré le Viatique, & l'Extreme Onction à vn domestique dudit Seigneur Cardinal de la Rochefoucaut qui estoit malade dans son Hostel Abbatial.

Et mesmes les Abbez de S. Geneuiefue se sont recognus subjects à ladite Paroisse, car Monsieur de Brichanteau, & Fr. Ioseph Foulon precedents Abbez ont receu lors de leurs deceds les derniers Sacrements, sçauoir ledit Sieur de Brichanteau par les mains du Curé, & ledit F. Ioseph Foulon par celles de Maistre Denis Dauiau Vicaire de ladite Eglise, & Monsieur le Cardinal de la Rochefoucaut & les precedents Abbez & les personnes seculieres demeurantes dans l'enclos de ladite Abbaye, mesmes le Sieur Morests Receueur dudit Seigneur Cardinal de la Rochefoucaut, ont présenté le Pain benist à leur tour en l'Eglise de S. Estienne. Ce qui monstre que le Curé de S. Estienne a droit d'exercer toutes les fonctions Curiales dans l'enclos de ladite Abbaye.

Et dautant qu'en l'annee 1640. il y eust des violences & excez commis sur le subiect de l'enterrement de l'enfant du nommé Petit Sommelier de Monsieur le Cardinal de la Rochefoucaut, & Portier de ladite Abbaye, on demande de part & d'autre reparation de l'iniure que chacun dit luy auoir esté faite. Mais les informations faites de l'auctorité du Lieutenant criminel, & les Decrets par luy donnez, sçauoir d'adiournement personnel contre Fr. Charles Faure & de douze Religieux, & de prise de corps contre aucuns de leurs seruiteurs, sont assez cognoistre de quelle part vient le trouble & la violence, & que lesdits Religieux ne peuuent s'exempter de rendre au Curé & aux Prestres de S. Estienne la satisfaction qui leur est deuë.

xvii. chef.
1. Factum p.
55.

La derniere demande concerne la fondation de certaines Messes faites par F. Philippes le Bel Abbé de S. Geneuiefue & Curé Titulaire de S. Estienne le 10. Octobre 1556.

Mais à cause què par le contract de ladite fondation, la retribution de chacune Messe auoit esté taxee à 3. sols, & que partie du fonds a esté employé en rentes sur l'Hostel de ville qui ont souffert de grâds dechets & retranchements, ceste fondation a esté conuertie en vne Messe haute qui se dit encores à present tous les Dimâches par le Vicaire de S. Estienne à 7 heures du matin, avec vne Collecte particuliere pour le repos de l'ame du Fondateur, & est estrange que lesdits Religieux osent se plaindre de ce changement de fondation, veu qu'ils ont eux mesmes supprimé dans leur Eglise depuis leur reforme, plus de soixante fondations faites par nos Rois, & par ledit feu Abbé Foulon.

Monsieur DIRVAL Rapporteur.

MS.A.9.2 v.4210 recto